

光緒山西通志

仕實錄六

錄六之六

山西通志弟一百五十

賜進士出身頭品頂戴兵部侍郎兼都察院右副都御史巡撫山西提督軍務臣張煦奉
旨監修

國朝 康熙雍正

高聯璧清源人康熙丙辰進士授中書舍人分校甲子順天鄉試掌內閣典籍旋轉禮部祠祭司主事監督北新倉稽察江南沿海鈔關風裁節操爲時所稱丁丑充會試同考官遷刑部郎中出督廣西學政時武選久弛商之巡撫題準開科粵西武風之振自聯璧始

劉振基清源人肆力古學爲文敏捷有時譽舉戊午鄉試第一選高縣知縣清廉仁恕卒於官民爲之罷市喪歸數十里祖莫不絕

鄭崐璽字殿光水人壬戌進士授三河令調普甯安化所
至以廉能著入爲吏部驗封司主事歷員外郎中轉戶科給
事中僑寓古寺布被紙帳澹泊如諸生論者稱之

鄭崐璜字黃玉水人壬戌進士除南宮知縣甫下車詢民
疾苦有不便者卽罷之以最擢戶部主事歷員外郎遷禮部
祠祭司郎中凡遇典禮考核得宜宗伯倚爲左右手出守常
德掃除各屬供億留心民事有所讞決以情衷三尺而行其
他善政甚多引疾歸

王德翼字慎之清源人由甲子舉人知廣元縣縣當水陸衝
事至立辦留意文教立義學厚廩餼暇輒與諸生講授士風
日上職滿升工部營繕司主事未任卒

鄭岷瑛字英玉崐璜弟幼穎悟讀書數行下所爲文以先秦

兩漢爲法乙丑進士入翰林以庶常分校辛未會試

聖祖親考上書房甚蒙

褒獎拜

御製詩集耕織圖端硯文綺之賜授編修日講官起居注人咸榮之後以疾歸嘗修縣志著作甚多散佚無傳

梁星慶字雲卿清源人丙戌進士除四會知縣簡靜廉明不事粉飾粵海素稱殷阜時以清介著旋里日囊橐蕭然仍以授徒爲業年及八十卒祀忠孝祠

鄭錫爵字公言文水人丙戌進士任甯晉知縣向例遇事科斂供億浩繁如歲修考棚衙署子牙河椿木府城河稅銀口外運米幫貼軍需折出贏馬僱役諸費久爲民累錫爵裁革至二十二條以最遷涿州知州甫三月升貴州鳳陽知府引

見賜香珠貂裘以旌之因親老艱於迎養

特恩調守廣平母憂歸服闋改授刑部員外郎復遭父憂卒
李夢庚字景蓮興縣人舉辛卯鄉試明年禮闈不遇友人孫
文定公時罷官南遊遂與之偕徧覽名山大川爲文益疏宥
有奇氣後歷宿松知縣多惠政罷歸之日囊橐蕭然

康大興交城人乙未武進士除廣東守備雍正末從經略張
勦貴州苗有功升廣州都司乾隆中隨征大小金川及西藏
屢邀優敘遷韶州營遊擊歷潼關副將告歸年踰八十卒

程懋字中孚祁縣人丁酉舉於鄉任容城知縣值水災捐俸
賑濟縣南接新安舊有四公閘電河所經流也其下爲積水
潭圩田數十百頃爲新安兵役占種強閉閘口盛雨則積水
橫流爲害懋相度地勢啟開洩水請於大府仍以閘歸容城

以時啟閉自是患遂息捐金建楊忠愍公祠置祀田百畝
立義學延師訓課政教大行以卓薦調知東光尋告歸卒年
七十九

王逾曾清源人性警敏負幹濟才官至許州知州甫下車修
城濬隍勸農重桑百廢俱舉許人有德政謠以卓異升戶部
郎中病歸卒於家

趙標陽曲人由恩貢知德安縣以廉介稱卒於官貧不能歸
葬士民助之以上太原府

張哲字默公翼城人舉康熙癸卯鄉試授寶應知縣詳請蠲
免荒田積逋瀕河罹水患捐俸振恤之母老乞養歸

高向璧字文衡翼城人丙午舉於鄉任嶧縣知縣墾田驅蝗
賑饑實惠及民無催科之擾以病乞歸

趙觀字杞瞻翼城人舉己酉鄉試任宜興令清介自持人不
敢干以私興利除害政績大著

劉若熊字敬菴臨汾人舉壬子順天鄉試累官四川道監察
御史巡視南城豪猾斂迹出爲貴州儲糧道適都勻苗變督
撫檄令安輯熊至爲開陳大義明示禍福苗民感悅帖然服
終大理寺少卿

王汝洪洞人由武舉官至碭石鎮守備署遊擊所轄民惠之
卒爲建祠韓宏緒者出行伍從征海寇積功至潮州遊擊調
鄖陽何覲光辛未武進士歷潮陽海門蓬濠諸營守備並有
賢聲

孔毓鉞字雪卿翼城人乙丑武進士授膠州營守備濱海士
卒驕悍時爲民患毓鉞至申明紀律有犯必懲民惠之而於

營中剝餉陋規盡爲裁革兵亦感悅一時稱廉能焉

杜增煜字耀生曲沃人乙丑舉於鄉以明通授文水教諭擢
望江知縣俗素強悍土豪結黨爲奸增煜密擒其魁置諸法
四境帖然剖決疑獄均平漕糧久之訟稀而賦無逋士民爲
作歌頌之

王智字愚若翼城人由庚午鄉舉任江西武甯知縣修城郭
課農桑弭盜安民尤留意文教後進得其獎借羣奮於學卒
於官士民建祠以祀

韓從王字用賓以五經魁於鄉壬申成進士歷惠安甌甯知
縣所在多治績

因秉彝曲沃舉人歷甘泉中部知縣所至課農桑興學校有
循聲

張我觀字昭民太平人舉癸酉鄉試謁選授會稽令邑繁劇號稱難治下車務以德化在官十年築海塘修學宮一切興利除弊皆卓有聲稱及歸措紳彙其政績爲書以贈家居事母孝雍睦族黨邦人矜式焉

張纘臨汾人甲戌進士事親孝在中翰十年恪勤厥職乙酉粵西典試尤稱得人

張友程字純公翼城人甲戌進士授南海知縣清積案出滯獄母憂歸起補定安令以最行取戶部主事遷員外郎引疾歸事兄友周甚謹喜宏獎嘗再與鄉試分校一時以得人稱之

劉泮字漱翁翼城人癸未進士除上海令煩劇號難治下車革火耗雪冤獄有妖巫惑民按治之度其非女也檢之果男

立置之法民頌之如神

王人隆字卓人翼城人己丑進士除長甯知縣縣行粵東鹽引道險遠價昂而漕運不能時至人隆令民在郡變鹽完課就近食鹽得免民累歲省賦數百金至今頌焉癸酉薦饑請平糴不允隆毅然發倉千餘石以濟之

賈鉉臨汾人進士由主事轉爲黃州府知府遷陝西驛傳道釐奸剔弊事集而民不擾攝臬司及學道兼並有聲績

亢宗瑗臨汾人以恩例授都勻府知府蒞任革除陋規撫恤窮苗不遺餘力建義學置學田爲士子籌公車費親勸駕焉郡人刊石頌之

賈鎔臨汾人由臨縣教諭擢盧氏令釐奸剔弊勸課農桑稱爲循吏改授涇縣亦有政聲

賈擴基臨汾人官部郎以廉敏稱出爲廣西右江道招撫土
目黃安國等調任永昌道時有西征烏蒙之役擴基躬入蠻
洞開誠拊諭歸化者踵至

李時謙字吉爻襄陵人由淮安商籍舉順天鄉試授樂陵知
縣巡視河東鹽政興利除弊惠及三省內轉御史敢言遷陝
西督糧道有奏議成集

趙登科襄陵人由將材歷任至紹興協副將饒勇有名勦海
寇屢立奇功

劉鎮字靖公洪洞人居親喪以孝稱由廩貢授中書科中書
遷工部都水司員外郎河工例有餽遺卻不受轉刑部郎中
時多積案寃獄有三年不雪者鎮以片言折之遂成信讞尋
致仕歸嘗捐學田助寒士膏火辛丑佐辦賑務蒙

賜匾獎旌

陰積祚洪洞人由貢生任東陽縣丞因進方物賀箋蒙

賜蟒緞領袖署義烏知縣清理夫役革除行戶士民感戴東陽食鹽民久困積祚攝令盡除積弊薦卓異當遷未幾卒貧不能治喪上官咨部給勘合馳驛歸葬

尉鍾咸字德洽太平人居以友愛聞歷確山伊陽知縣歲歉代完百姓征賦甚有循聲遷廣信府通判人思之弗衰

任天民字覺寰岳陽人由貢生任南江知縣起敝撫殘捍城衛民時稱爲邊吏之冠解組歸里恤族睦鄰士林推重

趙繼字指南岳陽拔貢任荊州府通判再判饒州府遷吉安府同知三藩之變辦理軍務籌畫盡善招安難民撫綏備至饒民感德立祠祀之

賈國楨字伯幹曲沃人巡撫漢復子以貢授蕭縣知縣廉勤
明敏民畏而懷之卒於官爲肖像以祀弟國楹令齊東亦有
循聲歷商河終興安州知州

裴繡標字端章曲沃人由貢生授中書出守邵武在職二年
力除積弊設義學除羨餘修橋梁清保甲勸農課桑政教大
行邵武民至今尸祝焉

上官源字昆澎翼城人初任白水知縣招徠流亡勸農興學
以最遷湖州同知尋知辰州府正身率屬蒞政勤敏以勞瘁
成疾卒於官士民悲慟如喪父母立祠祀之

以上平陽府

喬壯受字心益猗氏人性剛方康熙癸卯舉於鄉授陽信知
縣下車刻意釐剔清保甲嚴窩盜明決之聲孚於百里卒於
官縣人祀名宦子七人並有學行于濬舉人于濬進士萬年

令于沆領乙酉解額

喬士增字益其猗氏人甲辰進士除安仁知縣值吳逆煽亂未抵任而城陷從賊中間道走詣大軍督師獎其忠留幕中以親老乞歸再補交河弭盜賊奸遇旗民交涉事無所瞻循與校順天鄉試以強直忤當事止中四卷夷然不稍屈也卒因此鐫級及歸不名一錢食貧十餘年卒子雲根拔貢荆文學字在中猗氏人由副貢授武定州判署新泰令所在以廉介著事親孝居喪盡禮士林稱之

郭九會字繹茲猗氏人領已酉鄉試解額官臨安令爲政廉勤寬嚴並濟臨安士風卑靡充里胥半皆青衿下車盡革之而羅致其才者優以廩餼躬親課之由是多奮於學科第接踵引疾歸性警敏淹貫經史工詩古文家居闢敬交社講授

後進著有臨水勸戒錄課士錄及詩文存草

陳德敏字訥生猗氏人已未進士性倜儻好義勇於任事初授浮梁知縣再補考城黃河隄工自儀封入曹縣考城舊無工曹人以接壤故欲令分任德敏力爭復歸於曹縣人爲立石紀德焉

謝陳常字久治臨晉人幼學媚古爲文力振浮靡甲子魁於鄉旋成進士授編修充明史纂修官典癸酉廣東鄉試聲望甚隆居鄉立社學獎掖後進汲汲如有負士林宗之

陳綽猗氏人舉丁卯鄉試第一明年成進士選庶吉士改知縣宰浙之秀水植善鋤強不避豪貴吏民畏懷遭憂歸家居值協濟平陽軍需當事令蒲屬改納米豆以綽言得仍舊又各屬歲解大同草豆轉輸千里百姓苦之綽爲述於何給諫

相如疏罷之河東州縣皆陰受其惠云

陳王紀字憲之猗氏人已卯舉於鄉授感恩知縣有治聲擢刑部主事奸商王廷賓隱公帑數十萬朝士多受其餽遺事發皆獲重譴王紀獨無所染出守徽州新安汪氏以爭墳山搆訟數載牘可隱身王紀置弗視惟以理論情遣皆感泣息訟以老辭歸尋卒

尙友字論齋虞鄉人乙酉魁於鄉授黃岡知縣潔己愛民以勤慎著雍正初改補甯武教諭時郡縣皆新設邊人不知學友爲立章程勸講課文教蔚興告歸年踰八十卒

荆時中字允恭猗氏人由舉人授聊城知縣地衝劇稱難治汰冗發覆民懷吏畏甲申大水奸民乘閒劫掠捕首惡置之法四境帖然會截漕米留賑東昌各屬當事檄令分賑悉心

經畫民需實惠內遷戶部主事轉御史厯掌京畿道有直聲
謝三宅字克知臨晉人舉丁酉鄉試授鄖陽知縣廉介仁恕
民畏而愛之謝病歸足迹不入城市躬耕自給長吏罕見其
面

姚潛臨晉人辛丑進士授主事厯員外郎清耿廉介見推於
時子可棟亦以清著選官雲南徒步擔簦以往在官不名一
錢及卒無以治喪臨晉令王正茂爲貸官錢資歸其柩

王子信字適歡猗氏人由貢生司訓懷仁內遷國子監學正
厯兵部車駕司郎中性醇謹事親孝在官廉潔克勤其職

許光斗字碧辰由歲貢任邢縣知縣捐俸修城歲徵米艱於
轉輸力陳民困得改折色邢人德之歸里後授徒自給以終
焦端臨晉人授醴泉知縣性敦實而遇事明決政聲著聞張

維鼎者令岐山亦以果毅爲陝人所欽

以上蒲州府

晉璿字玉衡長治人已酉舉於鄉明敏有幹才厯浦江江都知縣所至清通賦決疑獄有所興革民皆樂之江都地當孔道事務紛繁璿調度甚善民不擾而事咸理

聖祖南巡賜御書

張龍貴字雲峯襄垣人吳逆之亂以千總從軍湖北敗僞將譚逆於琵琶灘復鄭西白河房山諸縣尋入蜀勦賊巫山先登擒其渠招撫夔府諸處並著勞績

聖祖親征噶爾丹以守備再從出塞蒙

賜扳指荷包補臺灣南路營守備遷浙江撫標中軍參將姜遇周字文生舉甲子鄉試考授中書改官龍泉知縣操行謹嚴吏畏民懷政不擾而事集甲午分校浙閩所取皆積學

士病卒於官橐無長物

趙驂字天錦長治人事親以孝聞舉庚子鄉試由明通授曲沃教諭葺學宮建文昌閣捐俸爲諸生倡厯署襄陵太平奉檄司賑務事竣不濫不遺職滿當遷力辭曰吾不獲以祿養親雖萬鍾何爲年踰七十卒

閻必崇字隆委庚辰進士除華亭知縣華亭本折錢糧二十餘萬民多積逋吏沿爲奸必崇事事出以詳慎積弊漸除甲寅乙卯沿海戒嚴修軍塞造戰船建斥候助月餉傾囊稱貸支給至六千餘金不以累民子宗衍字抗能亦進士知封川縣革陋規設學造士歲饑發倉穀平糶捐捧賑之

張皇輔字翊宸長治人以貢授青田知縣兵後招撫逃亡田皆墾闢歲辛酉裁汰營伍多流聚九都爲盜單車往解散之

鎮兵至謀勦九都力陳盜潰散狀餘皆良民願以八口保之
事乃寢民建祠以祀丙寅大水躬操小舟指揮防險多所拯
救尋以憂歸服闋補梓潼縣遷延安府同知籌邊裕餉甚苦
勞績嘗奉檄治道榆陽兩陷冰河幾至隕身當事嘉其勤奏
署兵備道卒於官

以上錄
安府

王永清臨縣舉人知羅城縣縣故永甯于清端舊治也地多
瘴蠻獍雜處聞者危之永清曰不遇盤錯無以別利器于公
彼何人哉下車輕徭薄賦立社學撫循五載甚有循聲及歸
人樹碑頌之王永春者其族也乙丑進士以清直著令粵之
陽江革陋規十八條亦爲民頌

范毓琦字培蘭介休人鄉賢三拔子由武科累擢正定鎮總
兵官有輕裘緩帶之風所至勤簡練羸弱皆成勁旅兩請效

力邊疆

優詔不許尋以老致仕歸

劉振威平遙人由武舉授廣東從化所守備以督修廣州城
監造火器功加都司僉事遷永定衛掌印守備控制諸蠻恩
威兼施後因安撫苗疆感瘴氣沒軍民建祠祀之

梁通洛字文濤介休人庚辰進士授濬縣知縣蒞官清白自
矢銘石以警建書院置膏火田勸士勵學文教蔚興士民頌
之立祠以祀

呂文櫻字果初汾陽人丙戌進士歷弋陽金谿知縣內遷部
曹轉御史擢通政司右參議出爲奉天府府丞以老乞歸令
弋陽時有以女先字甲而復受乙聘者卒斷其女歸甲又有
受人質田陰易典契爲賣契者亦聽取贖雖賄通媒證俱辭

確鑿而一二語卽決其僞旣署金谿有民某死於途其婦訴
爲仇讎殺而無據逮其仇別繫之而陰遣隸至仇家賺其婦
遂得實一訊而伏其敏察多類此兩縣民皆驚爲神性耿介
恥以夤緣干進其與行取也高安朱文端公嘗薦之所著有
春秋正宗及正氣錄子審韶乾隆甲戌進士有學行

崔鶴齡臨縣人壬辰進士除興甯知縣有廉操縣境峒獠雜
處奸宄時發編保甲定約束皆帖然服卒於官檄不能歸士
民爲醵金返葬李棠蔭其同歲進士也由中書改官清豐令
亦以廉明稱

劉而位字爾爵汾陽人舉癸巳鄉試授安陽知縣下車訪民
疾苦滌除煩苛訟至立決皆服其平擢知泉州府屬縣某恃
其叔方居貴近恣爲貪婪立劾罷之遷興泉永道以足疾歸

起歷四川鹽茶道調松茂兵備卒於川南永甯道素喜講學
制府尹以理學經濟體用兼優稱之所著書有省克引家訓
及社學鄉約條規

高能宣臨縣人丁酉鄉薦授平江令廉介善撫字下車之初
縣民以積逋繫者纍纍悉縱之曰數年之負責輸一朝中人
且不堪況饑疲敲朴之餘哉一意拊循躬親勸課值歲豐民
競輸將自此無逋賦頌聲翕作膺卓薦擢刑部主事母憂歸
廬墓二年病篤昇還家閏月卒

王元勳臨縣人舉庚子鄉試第一歷署清遠饒平知縣皆有
政聲權判潮州卒於官

劉廷翰字子藩永甯州人辛丑進士知政和縣實政愛民以
賢能調福安代者至盤倉穀陰令碾者碎其米曰穀溼計每

石折閱幾二斗廷翰不與校然缺額盈千矣建甯守疑之親臨核實縣民聞之環呼願求留任守願謂代者曰疇不畏新官嗔者而戀戀舊官乃若是耶命取穀再碾則每石得米五斗外且浮二三升代者語塞然猶執其厥色惡爲辭民譁然爭歸輦負以易頃刻而集以年老力請致仕未歸卒

田呈瑞字介璞汾陽人由中書襄事河工擢大名道未之任改臨洮道性精核耐勞苦所至講求利病務實績隴西歲饑發帑賑恤親行郡縣山谷間稽察嚴密胥吏無敢爲奸因相度地形於河西石佛灣鑿渠灌溉兼造水車令高田皆引汲歲增粟十餘萬石調金衢嚴道去臨洮人建祠祀之卒於浙之糧儲道

田震字又起呈瑞子也歷官盛京刑部員外郎出知姚安府

值歲旱滇中舊不報災震曰

朝廷以赤子付有司雖遠猶邇而遺之乎請於臺司獲賑恤是後遂以爲例山郡多磽确有大石湖當萬松山下爲衆流之衝震相視地勢隄其下瀦水二十里溉田可萬頃無憂腸旱歷雲安二府擢治行第一入都蒙

恩賜蟒袍貂皮人蔘香珠等物會開金沙江通銅運震在臨安會開車運百四十里大吏悉其能檄令督辦凡六年工竣擢陝西驛鹽道尋調湖北驛鹽道越四載以前冒滇中瘴氣毒發卒於官年四十有五震謹厚有卓識守臨安尤多政績有土司死而子幼者諸弟越次冒襲當事俱爲所蔽震至得其情力正之苗疆木期古處東川江外不隸滇蜀無頭目時抄掠行旅爲患震減車從入其阻諭以

朝廷恩威咸內附卽行視要害設堡寨定約束盜患遂息所著有謚彙集

梁禹甸平遙人以拔貢知長安縣擢河州知州廉介能自持不事逢迎所在有聲

董振祖介休拔貢官霍山令以慈惠稱擢工部屯田司主事卒於官

李致臨縣人歷知無錫定海諸縣有政聲以卓異引見特擢太倉州知州臥病京邸

命太醫院軫視加意調理旣而卒復蒙

賜頭等包衣給銀歸葬

以上汾州府

武超字景升高平人康熙初從剿山左逆黨以功擢守備海寇犯泉州萬安橋爲所據超從大軍力戰身被二創不稍卻

遂奪橋解泉州之圍其後屢敗賊廈門金門諸島累功擢福建提標遊擊故事商賈往來海口者營弁多受其餽遺超晉除之遷雲南參將安輯苗民亦有聲

鄭俊高平人甲辰進士授海康知縣爲政先教化治行稱最擢吏部主事歷員外郎郎中乞養歸事親以孝聞

楊仙枝字簡人澤州人丁未進士官檢討在館十年盡窺中祕書於當代掌故威能誦習典山東試號得人憂歸廬於墓側服除未補官卒

李汝憑字虎臣陵川人丙辰武進士任柳州都司三藩之叛郡屢被兵奉檄固守龍城邊陲賴以少安以援剿力瘁卒於途

賈斯在沁水人有幹略以貢生任保安知縣兼攝定邊靖邊

所在皆有惠政康熙申酉間西醜跳梁斯在年踰耆獨請行
間自効當事憫其老不許斯在曰軍興不獲列戎事斯在不
男子矣乃以輓運任之斯在走沙漠不憚勞商榷胥中肯綮
嬰病猶口談指畫邊事不少輟比卒不能斂士民賻之乃克
成禮所歷縣胥祀名宦

陳廷展澤州人文貞公弟也以歲貢歷太原平陽訓導遷欽
州州判歷攝永安西甯新興和平諸縣並有聲尋通判鄭陽
府地爲楚北重鎮艱於轉餉力請折價就近採買軍民稱便
鑿通渠水灌民田三十餘頃時與國有滯獄久不決守因是
罷及廷展攝篆一訊立辨遷羅定州知州未幾卒

陳廷統字與可澤州人由成都府通判累遷辰沅靖道值紅
苗蠢動以衆數萬犯鎮草事起倉卒廷統計城中必有內應

果廉得富室某甲等通賊狀駢戮之懸首城上苗望而氣沮將遁時鎮兵他征所餘止老弱激以大義卽率以尾追大敗之師旋市井宴然若不知有兵革者尋改福建延建邵道別釐奸弊寬恤人民以吏議去家居寄情詩酒所著有握蘭草桑乾集鎮筵防未議

陳廷弼字荀少文貞公次弟也以貢授臨湘令遷知澧州調桂陽所在有治績內遷去百姓攀轅流涕送之由部郎擢廣東糧驛道清操彌礪先是糧米有派費名色悉去之修倉三百餘所積儲如法樂昌北接澎陽山險漲發時有覆溺之患廷弼鳩工平治四百餘里成坦途又築瀕海長隄資捍衛民皆德之著有澧陽清田錄王屋山莊詩鈔

張文燦澤州人以選拔貢太學居家孝友任光澤知縣以慈

祥爲念不事鞭朴而境內稱治有循良之頌

陳廷繼澤州人事親以孝聞由貢生任國子監學錄以培育人材爲已任一生謙謹公正鄉閭愛重

陳賁懿字白村父廷慄見鄉賢賁舉辛未鄉試選涑水令父憂歸服除補杞縣令杞濱大河隄工歲儲焚木竹石向皆賦諸民力請上官免其供備正賦外無所增調署祥符以事罷起補甯晉知縣大陸澤歲泛溢爲患廝渠導其流洄出田千畝有奇民利賴之爲建祠立石所著有問津詩集

陳豫明字濂村文貞公次子也甲戌進士由編修官至福建鹽驛道清介自守不名一錢著有詩集

趙世正澤州人由舉人任涇安知縣興廢舉墜敦崇名義未幾以憂歸服闋補閩之南安甫到官值臺灣之亂詣大軍求

自効尋移疾歸

姬士麟字文叔高平人庚子舉於鄉知金壇縣講求利病杜絕請託催科有法民安之歷署松江同知沐陽知縣再充江南鄉試同考官沐陽連歲遭災爲疏川瀆廣蓄洩俾民水旱有備積勞卒

鄭采宣字載九沁水舉人官靈川知縣廉介有爲待士以禮而非公至者未嘗款接創造浮橋重修文廟續輯邑志清理學田政績懋著遷都察院經歷民思之不衰

朱三才字與參以貢授孟縣教諭遷鎮遠知縣兵亂後多逃亡招集復業軍衛屯米驛站幫費諸陋規裁除殆盡灤江驟漲官民廬舍同時漂沒三才懷印駕小舟隨流顛簸拯出男婦二百餘人飛檄請賑計口親給復輸金大興工役公宇民

居次第修復令災民得傭力就食焉上官嘉之旋委署思州知州父憂歸服除起補連山令戢奸詰暴民獠相安復遭母憂卒於家

崔文煌字郁周高平人由歲貢授西甯令懲奸植良以清鯁稱有吏曾給事制府徵稅至縣恃勢暴橫所爲多不法文煌按治如律制府深器之教匪李九桃事發東安所屬十一州縣轉相煽惑獨西甯無從者制府欲上其狀辭曰民自畏法耳令何敢授爲功也尋以疾歸去之日猶捐俸備荒居鄉多風義弟死悲悼成疾卒

崔涵字高平人由廩貢授麻城知縣滇逆未靖楚疆久困軍至供億有方事辦而民不擾歲饑設法賑之以最遷慶陽同知分守真定宣府所至有聲

以上澤州府

馮廷輔大同人由行伍累官潯州協副將康熙壬寅苗人覃
普滋擾南峙地灘五旋等處相繼煽動假廷輔總兵銜率師
討之賊依險自固乃乘夜潛兵繞山背縛筏而渡旣薄巢槍
弩齊發火光燭天賊眾驚潰以爲神赴江墜崖死者無算生
擒逆首及其黨三百餘人捷聞

衛
賜賚甚厚特授浙江黃巖鎮總兵官擢其子千總得勝爲侍

張鳳友應州人少負將略以勇幹聞康熙十三年隨征滇黔
所向克捷由雲南永北守備累擢四州建昌鎮總兵官旣平
吳逆威望益著進加左都督致仕歸卒

武甯周宇救圖靈邱人由東昌府經歷薦擢徐聞知縣甫下
車縣境英利村不戒於火延燒廬舍三百餘家急親往撫慰

捐貲助修葺民免露處歲稔復捐穀賑粥多所全活尋告歸
霍昇字正清大同人家世力農有隱德昇生負勇略能左右
射弱冠釋耒從戎昭磨多之役力戰有功總鎮俞召與語甚
奇之曰大將材也其後俞遷湖廣提督征紅苗籍隸帳下爲
親兵由千總積功累擢至雲南永順鎮總兵官調廣西左江
鎮雍正十年署貴州提督時九股苗聚山阻建城堡絕糧道
官軍屢衄昇統軍由下乘直抵台拱晝夜督攻連破土城七
十寨四十六分兵三路捕剿賊黨悉定升廣西提督明年逆
苗餘孽復蠢動率師討平之乾隆三年以疾卒於官同時楊
楨者亦以騎卒從征紅苗獲首功擢千總尋遷長沙都司鎮
府皆倚其能將重任兵民亦咸頌之忽遭疾卒年三十六時

論交惜

以上大府

李世龍字與雲左衛人康熙十三年以把總隨剿耿逆屢建殊績

賜蟒袍一襲加都督同知歷金華遊擊終陝西參將

楊懋盛偏關人由恩貢授蘭陽縣丞值歲旱懋盛出新意駕木排竹導民遠引水溉田人賴其利後遂傳其法遍於他縣以薦擢馬平令時縣有疑獄株連甚眾到官一訊而決得釋者數十人上官嘉其能遇郡中大訟多委之莫不迎刃而解以勞卒貧不能治喪當事爲給驛歸葬以上朔平府

張漢文榆社人平遙訓導康熙辛丑大禋朱文端公軾奉

命賑卹平陽汾州二府饑民俾董其事漢文晝夜勤勞稽察

嚴密民均霑實惠平汾人尸祝之以上遼州

程泉績字何功武鄉人力學勵行親喪廬墓人稱爲純孝舉

康熙己未進士授蓬萊令清介自守屏贖鍰裁陋規遇事切
民生力爲之惟恐不及以薦攝登州府同知致仕歸子必達
己未舉人亦以學行著於時任文水教諭分校戊子陝關鄉
試稱得人卒於官

杜李字仲白武鄉人積學工文由丁丑進士任遷江知縣下
車鋤豪滑除盜賊薄賦均徭興學課士民徭相安曠悍之風
一變內擢中書轉吏部考功司主事分校乙未會試先是

聖祖仁皇親試考官於暢春苑文獨稱

旨蒙

召見詢科甲里居官職甚悉溫語移時備承優獎闈後卽超
遷稽勳司郎中時以爲異數未幾以疾歸里居讀書課孫爲
娛詩古文爲後進所宗年七十四卒孫師周舉於鄉

陳舜裔字孝源武鄉人性明敏有志節舉甲子鄉試由聞喜
教諭登乙未會榜戊戌成進士雍正中謁選除奉新知縣時
選人授職許條陳時務疏入得

旨以陝省連辦軍需地方凋敝亟需整飭看爾才能可用其
往陝西遂改伏羌知縣舜裔感知遇到官除陋規恤災黎鋤
奸蠹一以實心行實政遇軍事芻粟飛輓咄嗟而辦大吏廉
其能檄署階州階民向輸薪官府疲於供應下車盡革之營
卒素驕悍捕治其不法者揭於大府並褫弁職一境肅然訪
得大滑傅某惡款纍纍將按治傅懼謀先發嫉其黨假暑月
徵糧爲詞勒鎮集罷市而以激變愬之當道遽奏劾落職實
則舜裔以催科各條預戒掾吏未嘗立限徵收也尋奉
旨署牧陳舜裔催辦國課並非私派苦累民間不必革職刁

民聚眾喧囂脅制官長目無國法者嚴審定擬具奏而承審者希當道意必欲文致如前又惡其颯強故摧抑之舜裔怒具揭部院陳峻勒刻轢狀

上益鑒其枉

嚴旨下秦撫方委官別讞而舜裔遽以病卒卒後寃得白傳與其黨遺戍有差

以上沁州

孫挹字澹然孟縣人康熙癸卯舉於鄉授徐聞知縣縣多逋賦廣爲招墾荒田盡闢不煩追呼而輸將如期會嚴海禁防軍與居民相錯爲詳定營制四境以肅性嚴介在官十年妻孥不以入署以母老乞休歸

陳肖祁壽陽舉人以知縣署浙之黃巖值歲歉捐俸倡賑民德之補於潛令興利除弊甚著循聲以最擢甯波同知乞病

歸囊無一錢

劉燦字韜士孟縣人舉戊子鄉試第一戊戌成進士授檢討
雍正中轉御史疏陳北省火耗病民狀由是遂有耗羨歸公
之議歷遷刑部郎中出爲福建汀漳道值屬縣耿某倉庫虧
額廉得實卽揭參耿亦撫燦他事互訐巡撫並劾燦落職聽
審燦性狷急嫉惡甚嚴屢忤大府同官亦多忌者其揭耿某
羣不直之相與媒孽燦憤甚以首觸牆立具詳求罷士民間
之環繞攀留其事遞上聞及被劾

世宗特革耿職而燦留任案旣結得補京職署禮部郎中以母
年踰九十乞養歸尋卒

張焜字映震孟縣人由潞城教諭累遷工部員外郎監興平
倉發奸剔蠹胥吏無敢肆爲侵漁擢戶部郎中出知黃州府

擒巨盜雪冤獄所部肅然未期年卒於官民思慕之刻石像

於安國禪林

以上平定州

周繼英忻州人已卯舉於鄉性樸直尙義扶危濟困三黨咸賴之選安邑教諭督課有方力新廟學士民翕然頌德

楊述字彭似忻州人康熙庚辰進士居家孝友處鄉黨周急濟貧人所依賴筮仕盱眙清察利弊革除陋規如帶征季鹽行戶之類悉行豁免一時有斷事如神之頌因前任事望誤罷歸教授鄉里以終

簿而堅字石生定襄人舉辛卯鄉試授定陶知縣時值亢旱興役增隄有以虛耗民財爲言者曰吾以備不虞也卒成之是年河決不能冒隄而止江南饑流民入境者設局留養衣食居處每事必親區畫全活幾及千人

李之檀字含香靜樂人以歲貢任長子教諭擢知珙縣縣居
蜀邊亂後流亡未復田多曠蕪俗巫蠱尠知書之檀廣招徠
立學社課其子弟興作鼓舞戶口日增風氣大開初應童試
止七人居九年十倍於前有登鄉薦者以最遷高郵州知州
禁革科派裁減火耗捐俸設育嬰堂救生船及施藥局愛才
禮士貧無能上進或婚葬失時者皆資助之民以訟至情道
理喻不妄施一笞而嫉惡特嚴於上官尤伉直無所屈總督
蔚誣劾布政使牟部臣奉

命會訊同官多望風影附周納成獄之檀獨證爲誣卒坐此
中以他事罷歸夷然就道家居踰十年卒高郵人祀之名宦
子暉字鑑溪舉癸丑鄉試歷官至淮安府知府致仕歸亦以
清節著

楊克慧字愚菴忻州人癸巳進士授大同府教授訓士以安
定紫陽爲宗薦擢平湖知縣調淳安皆著循聲告歸宦囊蕭

然以上忻州

王應虎字甫山代州人善騎射馬上舞大刀若飛以軍校從
征耿逆輒樹奇績嗣制海寇身先士卒所向克捷恢復海澄
澎湖累功至浙江總兵世襲雲騎尉擢福建漢軍副都統

賜賚甚優蔭一子入監子邦甯亦善戰積功至廣東高州鎮
總兵共推名將

李期遠崞縣人戊辰進士任隆德知縣仁心爲政請蠲窮民
賸糧數萬緡民立祠祀之擢吏部郎詮選公明人比之山公
啟事云同時賈瀛以舉人歷河間知府亦以廉惠稱

劉慄字樸夫代州人庚辰進士授商城知縣遺母憂起補陝

之長武調醴泉未任卒商城界連吳楚盜時出沒號難治悛
嚴保甲法廉得邑中積猾按其罪四境肅然在長武請豁道
賦五千餘金均鹽課以便民墾屯田以足賦歷職清慎自矢
蕭然若儒素卒之日兩邑士民走哭相屬立祠祀之

張輅字達元崞縣舉人歷邵陽白水褒城雒川知縣所至問
民疾苦凡有裨於地方者不惜捐俸以倡杜黃緣絕奔競以
廉勤稱告歸行囊蕭然有謂其迂拙者輅曰迂拙已入膏肓
以清白貽子孫不愈於僕僕作馬牛哉時論賢之

鄭疇字樂山五臺人戊戌進士授檢討

世宗御極下詔求言疇上封事極陳晉省虧空之累及臺山刺
麻科斂病民狀疏入奉

旨查辦適縣令陸長華按治刺麻瑣响木元旦姦殺事獄上

命寘諸法而令每歲從地糧中撥給刺麻銀千二百兩令其自行採買諸物科派之弊永遠革除合縣之民始出水火囍旋督學福建差竣授吉安府知府調南昌府卒於任在吉安多惠政被劾去官值大旱禱於金牛寺龍潭得雨郡人因名爲鄭公雨築甘雨亭寺旁繪圖徵詩後事白復職羣歡呼曰還我鄭公矣歲則大熟及去人思之不置立祠祀之

馮璽字樞南代州人少從兄璽學究心經濟精句股及九章算法循例授福州通判攝知府會臺灣兵起總督治兵廈門臬司糧道皆從行並委璽兼署身縮四印惶惚倉卒事無不舉一時服其敏給遷廈門同知進台州府知府修郡城闢書院墾淤田十餘萬畝甚有治績居六年以疾歸

馮慶曾字省菴代州人由貢生選汾陽教諭職滿擢雲臺知

縣歲饑捐金以振多所全活河州協兵以缺糧謀變環謀於州署勢洶洶慶會時攝州倅聞之單騎往諭許爲發倉衆乃解而告其帥懲爲首者十餘人一軍帖然雍正初遷甘州同知值西陲用兵奉檄督徵倉儲甚急乃聽民便以銀代米比秋稔米價大減則計時值糴以實倉而還其羨餘於民所償萬餘金人多迂之不恤也旋呈吏議罷歸事白補臨洮同知卒於官子鍾宿見鄉賢

馮慶長字崑源代州人事親以孝聞與兄友愛終身無少忤以歲貢宰滇之永平累遷陝西鳳翔知府所至革陋規除私派遇有濟於民生必竭力爲之至傾家資無所顧惜嘗令招遠值歲饑捐粟千石煮粥以食餓者刺濟甯大雨壞民廬舍計口授資靡及千金而築沂州北康莊隄開寶雞底店渠尤

爲利賴子奕宿淮甯知縣光宿黔西州知州並著循聲
馮章宿字閣臣少從父慶長宦遊於秦明習吏事遂循例選
授安州知州州鄰新安豬龍河環其境舊界汨於水兩地民
訟數十年不決章宿覽形勢彙冊籍四至疆界畫然民大服
遷霸州治河渠蓄泄有方民安其利擢順天府治中轉刑部
員外郎出知嘉興府以廉能擢杭嘉湖道杭嘉濱海章宿履
勘塘工得其要領於尖山石壩老鹽倉柴塘尤殫心精慮終
其任無風潮患勤於民事雖爲大吏而治案牘一如守牧時
以積勞成疾卒於官

張珥崞縣人由孝義教諭遷漳浦令漳俗刁悍珥以嚴明治
之釐剔弊竇邑大治人心感服爲作仁政諸艱歸行李蕭然
起補粵之永福調任諸羅並有治績歷遷彰德府同知河南

府知府正直率屬民愛之歷久不忘子鵬以人才効力軍前
敘功授刑部員外升郎中擢貴州道監察御史有直聲

張春慶字耕餘繁峙人家世儒春慶尤廉潔有志節後成進

士授中書舍人操守益厲卒於官

以上代州

祁斌安邑人康熙癸卯舉於鄉授新都知縣兵燹之餘民戶
凋殘斌課農桑興學校八年政成升延慶知州境接邊陲三
面環山築墩臺謹烽火祈降甘霖蝗皆自斃州民立碑志感
李興高字大生安邑歲貢任澧州州判擢商水知縣慈祥風
厲勤恤民隱居官三十年所在尸祀

謝檜齡安邑人舉戊午鄉試由中書改內邱知縣值旱蝗人
民逃散倉庫空虛下車卽招集流亡設法賑濟攝唐山政平
訟理行取主事告歸

李峴壽字小高安邑人已未進士除涑水知縣風骨峻潔不畏疆禦振興文教賑濟饑民上官以臺垣薦尋病卒涑人立祠祀之

李永輝夏縣人丁卯魁於鄉官順義令一以德化聽訟如神告休歸

孫超安邑人舉庚午鄉試令興化時值旱荒設法救饑民賴以活與庚子南關分校告歸年九十一卒

侯世勳夏縣人由舉人除鉅鹿知縣釐剔積弊勸課農桑屢攝劇邑俱著德政

張樹侯字次公芮城人丁丑進士授江津令律已愛民以招撫流亡爲務裁除陋規昭雪冤獄性嚴毅人不敢干以私當謁選時澤州陳文端公方掌銓部有謀爲道地者拒之及卒

江津人肖像以祀

李翔鶴字鳳屬解州人舉壬午鄉試知行唐縣創設義學清
理丁徭性仁厚不事鞭朴而摘奸發伏如神子迪由進士歷
涼州府同知

介錫齡字昌裔解州人辛卯舉於鄉官西華知縣值水災力
請發賑次年復旱蝗盡力驅捕恤監獄清案牘創設義學民
風丕變及歸囊橐蕭然尋以疾卒

樊大元甲午舉人任黃岡知縣值水災發倉賑恤並捐俸以
濟之民爲之立碑

景四維安邑人乙未進士任新喻知縣縣稱疲敝積逋不能
輸捐貲代償會水災購穀平糶改知涇縣倡修琴溪石梁商
民德之

秦郁夏縣舉人以知縣監賑兗州委署蓬萊縣並高唐州尋
宰臨朐所至謹慎勤勞案無留牘教士敦倫愛民如子多有
政績

彭人瑛安邑人辛丑進士知易州輕徭薄稅以治績擢保定
守積案一清累遷至湖南按察使操守廉潔持法寬平吏民
安之

馬謙益安邑舉人令青浦綽有政聲卒於官所著有讀書錄
孝子傳

劉標安邑人以父承灝蔭歷松江安慶知府累遷雲南布政
使內外數十年以勤慎著在滇除礦廠及鹽茶積弊豪滑悉
戡迹商民惠之

李閻權安邑人由貢生任南溪知縣捐修水旱塘防二十九

處設救生船迄今利賴艱歸起補塞灣嚴保甲禁聚博奸民
蠶役皆斂迹民風丕變

李秉儉安邑人居家孝弟喜施子由貢生薦擢部郎監賑畿
輔陝豫立科條絕弊端寶惠及民知青州府建社倉義學修
築海塘以衛城邑

劉樞安邑人以蔭授建水知州清正愛民民爲立碑建祠弟
桓官至湖廣督糧道亦以幹濟稱著有治越全書攀棘錄並

詩文集

以上
解州

趙憲普字二平閩喜人癸卯舉於鄉授湘鄉令賦重役繁民
不堪命憲普至悉除之值編審吏以千金進殿斥之無敢以
私增減者清丈田畝躬親鉤稽得浮糧四千詳請題豁當事
者疑其漏丈市惠勒令再報民皆震駭憲普奮身力爭乃得

免民多尸祝之居家友愛鄰里稱爲長著

任及伊字阿衡河津人舉癸卯鄉試授任邱知縣教民鑿井灌田遍野轆轤農力以溥羣呼爲任公并治任邱三年興利別弊以能吏著循聲疾卒任邱人建祠祀之

衛建藩字翰周絳縣人甲辰進士任文安知縣革陋規平積訟蠲除徭役案牘之暇課士子親爲指授政績丕著後坐失察逃人罷歸家居嚴正自持利濟爲懷閭里重之

秦錫祚字名卿聞喜人丙午舉於鄉由平魯衛教授擢曲江知縣政務寬大盡革陋規以最遷知會理州地新設屬極邊搖穰雜處無城郭衙署及地丁錢糧抵任適編審檄至民情洶洶力請當事題免規畫八年治具纒張擢工部員外郎李穎達絳縣人舉己酉鄉試任鎮原令地隣邊郡俗悍民刁

命盜案無歲不有穎達多方整頓力挽澆風又爲之編保甲平糶役邑人感之勒石建坊以誌其德

許啟芳字馨如絳州人庚戌武進士累官甘肅副將捐俸修文廟設義學延師訓課士風以振歲荒申請賑恤減賦緩征從征噶爾丹昭磨多之捷獲首功去之日士民泣送不絕楊嘉字美中聞喜人由拔貢授中書舍人歷部郎出爲鳳廬道轉江常鎮道所至有廉能名京口爲漕運要津丹徒丹陽兩邑歲終開濬百姓嚴冬荷插露立泥淖中力言於當事革其役歲省民費無算祀名宦

張念祖絳州人性至孝官建甯通判廉明公正時耿逆牙將喬正庫踞建甯恣睢尤甚因治博徒而杖其僕正庫訴諸耿念祖曰藩下例不得居境外正庫胡爲在吾土竟不爲屈

任作舟河津人父漢儒香山丞有惠政作舟由選貢歷平魯衛教授擢丹徒知縣卻陋規除積弊政聲煥然京口清道淤淺設法疏濬糧艘無阻其他賑荒葺繕城池寬徭役諸多善政卒於官士民惜之子作梅歲貢生好施居鄉多風義

馬生鱗垣曲人王子拔貢任永春知縣修文廟置義倉賑濟流民勦撫海寇士民感之遷工部主事歷員外郎中出爲雷州府知府

翟鴻儀字鶴林聞喜人壬戌進士除賀縣令俗獷悍健訟下車立條教申法令示以誠信士民畏服行取入都民有以十贏治裝者乃前所豁大辟囚也力卻之曰申寃本令職豈市報耶再補麻城有土豪黃某恣橫白諸大府佯爲治具給至榜殺之百姓稱快卒於官麻城人巷哭罷市棗石頌之

何星煜字天章稷山人壬戌進士任樂安知縣持躬儉約勤於撫字督修河隄捐建倉儲歲饑煮粥食貧全活甚夥行取兵科給事中未任卒

史宏坦字易齋稷山人丁卯鄉薦任崇明知縣清正自持不畏豪強縣四面環海詳請設立米船通商便民建書院親課之士競於學艱歸縣民感其惠集詩文爲一冊頌之

董象賢聞喜人以歲貢除偏頭所訓導邊地人文不振悉心誘掖士爭濯磨多有向學者咸勒石頌之卒祀名宦

張丕猷字允升絳州人辛未武進士授蘭州衛守備時用兵哈密歲饑民困轉輸多方調劑軍民胥倚賴因逸盜望誤免羣詣大府保留不得則相與環轅門而泣乃允俟賑荒運餉事竣解任及歸有泣送百里外者

趙向奎字聚五聞喜人讀書過目成誦丙午與父冬元同魁於鄉而名列父前年甫十七也一時異之宰溧水賦役繁重歲額外耗金二萬有奇毅然革之民建祠以祀攝署江甯調知嘉定地臨海俗健訟向奎判決如流積贖一清巨盜賈孟等踞險聚黨拒捕設方略掩擊盡擒之捐俸開渠溉鹽平江浦田千餘頃歲饑設廠煮糜以食餓者海水泛溢蕩民居駕艇募拯溺人所活皆無算超擢廬州知府遷蘇松道未任調糧儲道兼巡視河漕特擢江蘇布政使護巡撫因事罷歸蘇騰字雲甫稷山人壬午舉於鄉選平定州學正勤於其職州有重案諸生多牽連被斥騰力為辨白得保全者四十餘人其立教先行後文務爲實學平定文風之盛實騰啟之以

老乞歸

王純字誠齋聞喜人以貢任萬泉訓導雅意作人諸生薛某
饒於貲爲盜所誣持金求昭雪峻拒之而陰直其事於縣終
爲剖白其清介多類此卒祀名宦

甯詩文字漢章稷山人壬辰進士除吳川知縣廉惠有聲調
繁澄海當閩粵之交兼控海口七處素稱難治到官加意振
刷嚴輯姦究四境安謐僧徒惑衆前後斥逐至干人不避嫌
怨魚鹽耕鑿之利凡便民者行之必力除煩苛革陋規興書
院蒞任四年士民德之著有海疆政略藏雪齋詩集

高良弼字帝眷垣曲拔貢任豐潤知縣燭奸除蠹平賊惠民
以最升禹州知州專務教化鄉村各立社學絃誦之聲盈於
四境暇則親巡阡陌勸民種植禹人感德肖像祀之

李璿字玉衡絳州人辛丑武進士江州守備耿藩之變大軍

絡繹有掠婦女監諸空室者璿多方保釋論其家使各引還
居民皆感其義

趙挺元字峻飛聞喜人以貢歷沁水教諭勤於課士嘗攝縣
令以明敏稱朱文端公查荒澤潞奇其才薦擢耀州知州歷
署咸甯韓城渭陽諸縣所在政平訟理由西安府同知遷遵
義知府府屬社會多虛報至數萬石慮其遺害於民盡除其
籍雲貴土匪每與販人口入川嚴緝之升陝西驛傳道加按
察使銜署甘肅布政使晉秩鴻臚寺正卿卒於官

楊廷瑚字鳴珮聞喜人由貢生授行人升戶部主事監督通
州大西倉在職勤謹尚書趙及倉督張皆雅重之遭憂歸不
復出里居三十年建文社延耆宿主之造就甚衆遇貧乏傾
篋周恤無吝容人多其義

楊廷璋字玉章廷瓏弟也歷官刑部郎中台州府知府在部值河南白蓮教事發及澠池宜陽民變從欽使查辦單騎抵豫悉心審錄釋株連數百人監賑昌平官賑外復捐貲儲餽糴分給餓人及出守以蠶直不合於上官罷歸善醫時施藥濟人免佃租焚借券鄉里感之

馬皇駒垣曲人由貢生任內閣中書補蘇州府同知值泰州饑官吏措致失宜民海海將變大府患之以皇駒素有譽望檄令撫慰州民間其至皆帖然聽賑無敢譁者韓文懿公蒞嘗盛稱之

魯聖學垣曲人由歲貢任漳浦縣丞歷署縣篆並海澄縣事有幹濟才海疆多警清內奸禦外患筆畫指揮悉中機宜兵民感之立碑以志

以上絳州

張其維字德隅蒲縣人性純樸苦志力學舉康熙乙酉鄉試授嘉魚知縣以廉惠稱在官築隄堰葺城垣修廟學建社倉以及公署祠宇義學義田多所營建規制一新致仕歸耕讀

課子若儒素然

以上陽州

蒲益霖霍州人以選貢擢福建鹽大使克勤其職閩中灘流險惡時壞商船瀕河居民往往乘危收貨爲估客患益霖嘗解餉遇其事立擒其魁白郡守置之法追還客貨並申禁令行旅遂安

張明趙城人舉丁酉鄉試授雲南思樂令訟簡風清以文章自娛廉俸所餘盡給其弟解組歸餽粥不繼晏如也

以上霍州

右康熙年一百七十三人

又十二人附見

孫鴻淦字永公興縣人雍正癸卯進士授公安知縣剔弊釐

奸政聲卓著卒而民思不忘天性孝友爲諸生時兄楨淦爲人所殺借弟嘉淦手刃其仇於獄一日夜行三百餘里出奇計以脫於難好學所著有莊子內篇評註及興縣志

柳淦字淵如太谷舉人聘充己酉河南鄉試同考官選德陽知縣多惠政縣燠樓火整衣冠肅拜火旋滅人咸異之期年告歸淦事親孝卹貧周急有義聲

鄭時慶字華臣文水人癸丑進士以縣令官黔中再補金匱諸縣政績循聲所在著聞同知曹州府遷安慶知府調鎮江連典巨郡決事無停機詳審明允一時翕然頌之終於運河兵備道

鄭廷楫字濟川文水人癸丑進士由工部主事轉御史遷刑科掌印給事中多所建白如疏通舉班禁止州縣私罰非刑

及捐納虛銜與貢監生員濫用旗牌諸摺俱下部議行
李從龍字彥臣太原人庚戌進士署饒陽知縣裁革冗稅捕
治巨豪嚴拒請託尋補阜平調浦江歷奉化諸縣並著循聲
內遷戶部主事以病歸囊無餘資所著有培根堂文集
王介福徐溝人癸丑武進士累官臺灣總兵練達營務平日
與士卒同甘苦能得其力臨戰孤身先陷陣功績卓著

王志曾字欣沂陽曲人乙卯拔貢官莘縣知縣調諸城撫循
士庶不恤勞勩歲饑力請截漕賑濟以徵解未完罷歸當被
劾時東撫明惜其賢及移撫山西陽曲令初見卽問之答以
不知明怪之令曰惟不知所以賢耳子雯進士澤州府教授

以上
原府太

裴世兆字瑞菴曲沃人天資卓越博覽經史雍正癸卯進士

任永淳知縣清廉慈惠憂歸再補唐縣操行彌勵

劉勤字思贊洪洞人能文工書事親以孝聞以貢任刑部郎中轉御史巡視中城至六年復巡東城中城爲商賈雲集之區情僞叵測旣視事法紀肅然東城地空闕凡咨死都門者寄厝白骨森森捐俸購地爲義冢掩埋之旋授霸州道捐資營倉兒淀稻田二百餘頃復巡察天津滄州霧州賑務區畫得宜全活尤衆旋擢鴻臚寺卿歷河東副總河乾隆元年遷直隸河督每值險工躬親搶護或徑宿隄上不避勞勩尋因公解任歸里杜門不與外事而爲善獨勇邑有營建多身任之

張宗輔字英公曲沃人與兄宗顥同舉王子鄉試選新鄭知縣調夏邑憂歸起補禹城縣所歷皆有惠政生平廉潔自持

嘗署鄭州值金川軍務絡繹事集而民不擾辦賑災躬自履
勘民得實惠而在禹城力除漕糧積弊人尤難之宗顥字友
程澄海知縣亦以廉介稱

張嗣榮字欣木浮山人由大理司務遷戶部主事怡賢親王
及尙書蔣文肅公咸器重之會盛京戶部缺司員卽以嗣榮
應選到官竭誠殫慮陋規弊竇釐剔殆盡胥吏無敢爲奸於
流人尤體恤周至職滿回京擢御史奏請嚴緝捕以弭奸盜
設行市以利商賈闕闕肅然泉幣流通一時翕然稱之引疾

歸尋卒

以上平陽府

張中行字道存虞鄉人雍正甲辰舉於鄉歷延川鳳翔知縣
俱有惠政尋宰三水值歲歉當事奏撥豫米賑關中令縣民
由閩鄉接運中行以山路崎嶇力耗費鉅較近緇價更昂力

言不便遂寢其事憂歸服除起補同官歷安定長武以勞成

疾卒

蒲州府

崔鍾琚字三采襄垣人雍正癸卯進士任贛縣知縣留意教化力振文風與分校丙午鄉試所得俱名士致仕歸值歲祲散給籽種鄉里惠之

趙飛熊字夢徵長子人甲辰武進士由守備歷濟甯都司城南回民與州人構怨將入城仇殺飛熊單騎往諭事遂解楊橋口河決大學士劉燾令督巡料場適抱病力疾勘閱晝夜罔懈劉歎賞之遂擢河標遊擊攝副將四方冠蓋輻輳或有餽遺輒嚴拒之兵備道李清時嘗曰任城同官以清節著者趙公一人而已年七十告歸家居多義行

崔洪字子瞻襄垣人癸丑進士除伊陽知縣調榮澤賑災恤

民多有惠政

以上潞安府

梁成武字繼文介休人雍正癸卯魁於鄉授寶雞令聽斷明決案無留牘調渭南時西陲方用兵羽檄旁午應之裕如果親王統大兵過境見耕耘滿野嘆爲賢令薦之將大用積勞成疾告歸卒

賀方泰臨縣人丁未進士

廷試時以書法清秀蒙

賜緞二匹授盧氏知縣調永甯興利除弊政務寬厚總督田吏治尙嚴刻弗善也改校官尋補代州學正有人師之稱嘗自言一生無愧心事卒於官

段瑄字士瑤汾陽人雍正八年以孝廉保舉任棲霞知縣歷海豐蘭山所在有政績清操自勵居官十八年致仕歸貧不

能給朝夕鄉人重之

王琮字石甫介休人由廩生舉賢良委辦戶部檔房列上考出補山東庫大使膺卓薦攝濟南府同知歷職清慎所在有聲以老乞歸賦詩講學徜徉林下士人爭事之

張士俊字魁選介休人少充上苑軍士善騎射膂力絕人積勞至淮安參將淮郡時以河決爲虞庚戌秋河水暴漲吏民驚惶失措士俊請決洪澤湖隄使水入湖則所傷不過濱湖田禾而一郡可保無虞所全實大當事壯其膽識從之累擢重慶總兵江流自三峽而下灘阻重重奏設救生船以濟不測至今利之調雲南昭通鎮以年老乞休卒於家

梁溥字宥宇介休人由明通擢閩鄉令調榮澤適中牟工興檄調協助出錢募役以應俾農皆安業西師過境親立道旁

慰勞軍士市井無擾皆欣感之艱歸起補鞏縣調祥符率於
官雅好事在閔鄉修三鱣堂鞏故有杜少陵祠爲重葺置田
以供祀事云以上汾州府

樊初荀沁水人舉甲辰鄉試第一知甯遠縣廉惠有聲奉檄
查各府倉庫謝絕苞苴鉤稽不多假借囚之忤時動多牽制
慨念直道難行請改教職尋授蒲州府教授時州初改府學
籍不滿百人勤於訓迪厯十餘年從學者遍郡邑有經師人
師之稱澤州府

韓國瓚廣靈人舉雍正癸卯鄉試知靜海縣有惠政再厯獲
鹿固安二縣以賢能薦卓薦擢霸州知州既歸杜門讀書自
娛

畢映大同人雍正癸卯武進士授侍衛出爲陝西遊擊從西

征敘功升參將尋屯田蔡巴什湖乾隆元年以勞升慶遠協副將宜山縣諸蠻蠢動率所部馳往擒其渠藍明友覃奉恩等擢廣西右江總兵歷四川建昌廣東右翼二鎮撫緝軍民甚著威惠以年老屢疏乞休不允內遷鑾儀使卒於官

郭安字清平大同人以把總從征西路累功擢陽和守備超遷襄陽遊擊地當孔道設法巡緝信賞罰均勞逸四境安堵漁戶歲納魚六百觔卻不受後卒於穀城軍民思之爲立碑平生重然諾好施予同官陳某暴沒負債纍纍立爲經紀歸其喪人多其義子士衡乾隆辛卯進士

劉章字煥然大同人由行伍累官至助馬路參將領鎮軍戍甘涼諸郡士卒多里人子章申明紀律有犯者卽親故弗宥軍行肅然累遷高雷廉鎮總兵會安南違例闖入滇邊制府

檄令相機剿撫章諭以

朝廷德威遠使齎表謝罪守約如初調南贛鎮民以私忿聚千人挺刃相向勢洶洶章單騎曉以利害立時解散後移鎮太原累疏乞休歸卒年七十章善撫士卒留心民瘼高州失火延燒數百家南安水暴漲壞民廬舍並捐廉周恤令無失所兩鎮尸祝之

母椿齡陽高人由行伍累官辰州協副將署鎮寧鎮總兵值九股苗騷動經略檄令攻公鵝寨寨踞一峻嶺叢林密菁四面環溪深不可測乃設巨艦架飛梯設藥箭仰射寨中火發賊驚竄擒斬略盡以疾卒於軍

馬光祖字繩武大同人貌魁梧多膂力精於騎射以千總署陽高守備清軍備嚴巡徼營伍整飭內擢京營守備歷遊擊

參將皆以廉勤稱乾隆三年出為甯國營參將卒於官囊無餘貲家人鬻產始克歸其喪

王泰運字興若以行伍從征滇蠻摧鋒陷陣每戰輒先登敘功由千總超擢張家口遊擊復以西征屢建奇績遷河間協副將畿南劫盜時發泰運嚴督官兵分路偵緝立擒渠魁十
一人置之法餘黨盡散乾隆中移疾歸卒於家以上大同府

李昌宗字衍仲孟縣人領雍正甲辰鄉薦授紫陽令為政持大體前令某羈久病沒妻孥貧苦無依昌宗為經紀其喪並資以歸調繁三原新文廟革陋規均物價民感之建坊以紀德政擢刑部主事卒

孫寯字毓秀孟縣人癸丑進士授樂陵知縣時黃河故道泛溢為患寯募民疏濬沿隄編戶稍安漕米所經官吏視為利

藪爲痛草積弊調文登饑饉之後民多流亡極力撫輯捐俸
廣營區焦以棲來者尋改發直隸補元城以最調宛平理繁
剗鉅備極勞勩未幾卒

以上平定州

張守謙字胥六醇縣舉人授寧都令廉明多惠政雩民有催
科不擾雞犬安決獄如神民稱快之頌未幾罷去卒於南昌
官舍時論惜之

馮元方字伯直代州人甲辰進士授隆平知縣遷開州踰年
擢惠州知府所至廉幹有治聲職未滿遷廣東南韶連道乙
卯貴州苗叛調粵兵會勦以元方監紀軍事抵古州與鎮臣
議攻守皆中窾會其勦滾縱勞績尤著滾縱者叛苗首也尤
凶黠陽投誠而陰實偵伺元方令於衆曰釋此苗不誅則諸
苗不懼過此時不勦則後勦無名乃嚴鼓破滅之古州苗百

十寨皆歸命蕩平之後惟以止殺善後宣布

皇仁爲務經略張廣泗深倚任之尋遷廣西按察使到官踰月卒弟允升字仲孚癸卯進士授嘉禾知縣有惠政性孝友淡於進取居年餘以疾辭歸就兄元方於隆平值歲災佐之檢稽戶口賴全活者萬三千人未幾卒

張錫錦字元章崞縣人舉己酉鄉試宰浙之西安勤慎廉明長於聽斷孔氏之居浙者先聖嫡裔也祭田爲豪強所奪錫錦據籍丈得五百畝又銅山源地九十餘頃悉丈還之邑有疑獄久不決錦至立爲剖判兩造咸服西安人奉之若神明張盛世字際泰崞縣人王子舉於鄉授荏平知縣有惠政調知膚施地瘠民貧逋賦甚衆盛世勞心撫字雖嚴檄火催卒不忍從事敲朴幾千吏議賴郡守惜其賢得賤丁艱歸遂不

復仕

張維城崞縣人癸丑進士授無極令培植士類利濟民生凡
差徭稅課有病農剝商者悉行除革縣人頌之

以上代州

張考字爾徵夏縣人雍正癸卯進士以庶常改刑部主事累
遷吏部郎中視學河南建議爲韓文公請置博士白李孝女
之寃奏旌之制府王好言開墾州縣希風或虛報升科至爲
民累力陳其弊核減有差調廣西學政適義甯苗變粵督馬
議用兵諮以軍事考爲籌畫勦撫機宜亂遂平因染瘴乞歸
尋攝金衢道歲歉不待報命輒開倉平糶動帑發賑忤當事
意謝病歸考內行純摯遇事持正雖掌文衡而留心民瘼不
竟其用人惜之

葛德潤安邑人癸丑進士授禮部主事擢御史前後建白類

皆有關民瘼乾隆戊午甲子兩典雲南鄉試督學福建調湖北革卷價陋規數千金先後條陳文場事例多見施行親老乞養歸建宗祠置祭田教授以終

以上解州

楊瓚字黃在聞喜人癸卯進士除建昌知縣縣濱江湖多水患又當江廣衝衢差役繁急加意撫字裁漕運陋規米七百石決圩消水築壩防澇民爭頌之擢知賓州艱歸服除補德慶州值水溢入城爲文以祭水立退遇蝗災祭禱會大雨蝗盡死

梁萬稷字翼菴澤州人由諸生舉賢良方正授衡水知縣拯水災清積逋厯知承德及定州承德民有被殺於途者盜逸不獲其家誣指爲仇某坐大辟萬稷廉其寃遽釋之終廣西太平知府

李曙字寅明聞喜人丁未進士知漳浦縣濱大洋海口凡七處商船出入例納規儀曙下車盡革之以廉惠稱母憂歸尋卒

暢翽字扶衡聞喜人庚戌進士以知縣需次河南嘗署新蔡民有被殺死者前令誤擬某夫婦抵罪翽覆審某誣服狀將平反而前令復任翽爭之力不得拂衣去尋改選潞安教授敦勵名節激濁揚清告歸潞人懷之以上絳州

右雍正年四十二人

山西通志卷一百五十